

REGIONAL NEWS BULLETIN

HEADLINES (EVENING)

- 1. Union Home Minister Amit Shah an Aizawl khawpui atanga Zokhawsanga Assam Rifles insawn tur chu sawrkar laipuiin Mizoram mipui a ngaihhlutzia tih lanna a ni a ti.
- 2. Assam Rifles in Aizawl khawpui chhung atanga an chhuahsan tur Map vawiin khan Assam Rifles leh Mizoram sorkar aiawh ten an inthleng tawn.
- 3. Padma Awards-2026 dawng thei tur rawt duh tan hun hawn tan a ni.
- 4. NASA chuan kum 2024 chhungin an chhut lawk aia chakin tuifinriat chim chin a sang tih an sawi.



UNION HM VISIT

Union Home Minister Amit Shah an Aizawl khawpui atanga Zokhawsanga Assam Rifles insawn tur chu sawrkar laipuiin Mizoram mipui a ngaihhlutzia tih lanna a ni a ti.

Pu Amit Shah hian vawiin khan Assam Rifles hmun 23 sector Khatla-a Aizawl khawpui atanga Assam Rifles Zokhawsang-a an insawn tur puala hun buatsaih a hmanpui a, he hunah hian thusawiin Union Home Minister chuan Aizawl leh Mizoram leilungin a zirloh avangin hmun tam takah indal a awm thin a, khawpui zauhna tur a van laia Assam Rifles an insawn tur chu lawmawm atih thu sawiin Mizo leh Mizo mipuite duhdan a takin a thleng a ti a, kum 1890 atanga AR an awm atanga tun dinhmun ngaihtuah chuan hetiang hmasawnna liantham ala awm ngailo tih sawiin Prime Minister Narendra Modi kaihhruai sawrkarin Hmarchhak mipuite a ngaihsakzia a tilang a ni a ti.

Union Home Minister chuan hmarchhak state chu ramchhung hmundangte nen thlunzawma tih hmasawn chu an tum ber a ni a ti a, remna leh muanna a thlen theih nan Modi kaihhruaiin theihtawp a chhuah tih a sawi bawk.

Chief Minister Pu Lalduhoma pawhin he hunah hian thusawiin Assam Rifles in Mizoram sawrkar kuta an hmunpui an hlan chu Mizoram tana hun chhinchhiahthlak tak ani a ti a, Union Home Minister Amit Shah an a rawn

hmanpui chu lawmawm atih thu sawiin Assam Rifles te chuan Aizawl khawpui chhuahsan mahse Mizoram sawrkarin an ngaihsak chhunzawm zel dawn a ti a, Assam Rifles te chu state chhunga remna leh muanna a awm theih nana an hnathawh an hre reng tih sawiin an state chhunga cheng te nen inrem taka an awm theih avangin lawmawm atih thu a sawi bawk.

Vawiina hun hmanah hian Assam Rifles in Aizawl khawpui chhung atanga an chhuahsan tur Map inthleng tawn a ni a, Assam Rifles aiawhin Lt Gen Vikas Lakhera leh Mizoram sawrkar aiawhin Pu Vanlaldina Fanai Commissioner & Secretary ten an inthleng tawn a ni.

Assam Rifles Zokhawsang-a insawn tur chungchang hi nikum October ni 23 khan Mizoram sawrkar leh Assam Rifles aiawh ten New Delhi Mizoram House ah inremna an ziak tawh a, he inremna ah hian Assam Rifles te chuan Lammual leh a chhehvela Assam Rifles hmun, Unit Hospital, Loch House, Quarter Guard leh hmun hrang hrang an chhuah san ang a, hetihlai Assam Rifles 23 sector Headquarter Khatla ami leh DIG chenna Raj Bhavan bul ami chu an chhuahsan dawn lo a ni.

Aizawl khawpui atanga Assam Rifles Zokhawsang-a sawn chungchang hi kum 1988-a Pu Laldenga kaihhruai MNF Sawrkar lai atanga intan a ni a, kum 2019 khan Union Home Ministry chuan Assam Rifles te chu Zokhawsang-a insawn turin thu alo pe tawh a, hei hi harsatna hrang hrang Assam Rifles lamin an sawi avangin tih khawtlai a ni a, hemi hnu hian hmalakna hrang hrang kalpui niin kum 2023 khan Union Home Minister Amit Shah chuan Assam Rifles Zokhawsang Complex chu alo hawng tawh a ni.

<><><>

WORLD CONSUMER DAY

Thil leitute dikna leh chanvo humhalhna ni World Consumer Day chu vawiin khan Mizoram hmun hrang hrangah hman a ni a,

Lunglei-ah chuan DC Conference Hall-ah consumer-te dikna leh chanvo inzirtir tharna hun hman a ni a. Lunglei DC Pi Navneet Mann chuan consumer-te dikna leh chanvo humhalh chu thil tul tak leh sawrkar pawhin a ngaih pawimawh a ni, a ti a.

He hun hi Lunglei District Consumer Association (LDCA) General Secretary Pu R. Lalrochama'n a kaihruaiin hun hmannaah hian Lungleia sawrkar official-te, service provider hrang hrangte, LDCA hruaitute leh branch ai awhte, khawtlang hruaitute leh pawl hrang hrang ai awhte an tel a ni.

Champhaiah pawh World Consumer Rights Day 2025 chu I&PR Conference Hall, CHANEM-ah hman a ni a. Champhai DC Pu Mohammad Aaquib chuan khuallian niin he hun hi hmanpui a ni.

DC Pu Mohammad Aaquib chuan nunphung nghet leh hrisel duhthlanna chu consumer zawng zawngte tana hman theih, hmantlak leh man tlawm zawka siam a tul zia a tilang a ni a ti.

Kolasibah chuan District Food, Civil Supply & Consumer Affairs Department leh Kolasib District Consumers' Union (KODCU) te buatsaihin hun hman a ni a.

Kolasib DC Pu Robert C. Lalmangaiha chuan Consumer-te'n an dikna leh an chanvo an hriat a pawimawh a ni, a ti a. Thupui 'A Just Transition to Sustainable Lifestyles' tih chu KODCU Vice President Dr C. Lalmuankima chuan a sawifiah a ni.

Serchhip district ah pawh World Consumer Day 2024 pual hian Serchhip DC Hall-ah hun hman a ni a, Additional DC Pu Lalrinzuala chuan khuallian

niin a hmanpui a. Serchhip District Consumer Assn Secretary Dr. Laldinpuia chuan kalkhawmte a zirtir a ni.

Lawngtlai District Consumer Protection Council (DCPC) bultumin vawiin khan ' World Consumer Rights Day 2025' chu DC Conference Hall- ah hman a ni a. SDO (Sadar) Pi Margaret J. Vanlalremmawii chuan Consumer in Mimal, Khawtlang leh Sawrkar a huam vek tih tarlangin, consumer- te dikna chanvo hriat leh humhalh hi mitin tihmakmawh a ni, a ti.

Khawzawl DC Office Auditorium ah Addl DC Pu Lalfakzuala chuan mipui/consumer te'n an dikna an hriat a, thil dik lote tihdik a nih zel theih nan hma la ngam turin a duh thu a sawi.

Vawiin khan Hnahthial-a Horeb Conference Hall-ah District Civil Supplies Office leh Hnahthial District Consumer Union (HDCU) bultumin World Consumer Rights Day hman a ni a. Hnahthial DC Pi K. Vanlalruati chuan mitin mai hi consumer kan nih vek thu sawiin dawr neitute leh a leituten rinawm tak leh dik taka thil kan tih a, kan kalpui thin a tul hle a ni, a ti.

Keifang Zawlbùk ah pawh District Consumer Redressal Council, Saitual District huaihawtin World Consumer Right Day, 2025 hman a ni a, he hunah hian Saitual DC Dr Lalngura Tlau chuan a hmanpui a. Vawiin hun hmannaah hian sorkar official hrang hrang te, NGO hrang hrangte leh Keifang Higher Secondary School, Consumer club member an tel bawk a ni.

<><><>

CADS

Central YMA hnuaia ruihhlo do tur Central Anti Drugs Squads (CADS) chu dinthar leh niin vawiin khan Central YMA Hall, Tuikhuahtlang ah an mahni lawmluhna hun hman a ni.

He hunah hian thusawiin Central YMA President Pu Lalhmachhuana chuan tunhnaiah Ruihhlo in nasa takin Mizoram a chim chho mek a, heti reng a a kal chuan Mizo thalai te hi ruihhlo in a suat nasa hle dawn a ni, a ti a. Hetiang dinhmun anih avang hian ram leh hnam dinchhuah leh na turin mitinin mawhphurhna an nei a ni ti a, Pathian rinchhan chung a ke pen zel chuan Ruihhlo nena indona ah hnehtu a nih theih dawn a ni a ti.

CADS-ah hian Aizawl khawpui chhung Branch hrang hrang atangin member 42 awm in Convener tur hi Pu Roneihthanga, Treasurer Central YMA a ni ang.

<><><>

PADMA AWARD

Padma Awards-2026 dawng thei tur rawt duh tan hun hawn tan a ni. Kum 2026 Republic Day ah Padma Award dawng turte hi puan a ni leh dawn a. Padma Award dawng thei tur rawt duh tan July ni 31 thleng hun hawn a ni a. Rashtriya Puraskar Portal-ah Online hmangin rawtna hi thlen theih a ni a. He portal-a rawtna thlen chauh hi pawm a ni ang.

Ramchhunga civil chawimawina sang Padma Award pathum- Padma Vibhushan, Padma Bhushan leh Padma Sri te hi kumtin sem thin a ni a. Zirna,vantlang rawngbawlina, damdawi lam, thu leh hla, sumdawnna, Industry leh infiamna lamahte mi hmingtha leh chawimawi phute hnenah hlan thin a ni.

<><><>

UNION I&B

Union Minister of Railways, Information and Broadcasting, and Electronics and IT, Ashwini Vaishnaw, chuan vawiin khan Zetwork Electronics campus thar a hawng. IIT Thaiyur-a hawnna hun hmanah Union Minister Vaishnaw chuan sawrkarin zirlaite hmasawwna turin nasa taka a puih thu a sawi a. Technology lama hmasawn tur leh ngaihtuahna thar hman kawngah tan la turin zirlaite a chah a. Pu Vaishnaw chuan Sriperumbudur leh Manalur ah electronic industry pahnih a din thar tur thu sawiin cheng vaibelchhe 1112 ruahman anih thu a sawi a ni.

<><><>

NASA

NASA chuan kum 2024 chhungin an chhut lawk aia chakin tuifinriat chim chin a sang tih an sawi. US Space Agency sawidanin nikum chhung khan tuifinriatin khawmual a chim san zat hi centimetre 0.59 in a san belh tih a sawi a. Centimetre 0.43-a chim belh tura an ngaih aiin a sang chak tih an sawi a ni. Tuifinriatin khawmual a chim chin san chakna chhan hi khawvel lum chak avanga tuifinriat tui lum zel vang a nih thu sawiin vur tlang tui zel avang pawh a nih thu an sawi a ni.

<><><>